

# DEO OPTIMO MAX. UNI ET TRINO, VIRGINI DEI-PARÆ ET S. LUÇÆ,

Orthodoxorum Medicorum Patrono.

BIU Santé  
Médecine  
Paris

## QUÆSTIO MEDICA

QUOD LIBETARIIS DISPUTATIONIBUS

*manè discutienda in Scholis Medicorum, die jovis vigesimâ quartâ  
mensis Novembris, anno Domini M. DCC. LXXXV.*

M. SIMONE-ANTONIO BRINGAUD, Doctore Medico, Præside.

*An Phthisi ultimum gradum nondum assecuta, aqua Cauterienses, vulgò de Cauterès?*

### I

**I**NTER judicatu tardas ægritudines phthisi pulmonari frequentior nulla, nulla periculosior: palàm occurrit ferè ubiquè tabes; mors hujus sapissimè finis: ideo si tabido Medicus advoceris, institutæ therapæiæ vim morbus eluserit, fatoque fungatur æger, filet cavillator etiam mordacissimus; nullo rudis injuriæque vulgi sermone vapulas; omnem à te suspicionem amovet vel sola morbi denominatio.... nec morbus acerbior alter: ægros quidem acriori dolore pressos reperies; verùm hos latet natura morbi; recuperandæ sanitatis spes elucet; & quod melius ferendi doloris solatium? Quod eidem leniendo efficacius fomentum? Phthifico conscia mens mali cuique sua est; quæ eum fata maneant, multiplici exemplo didicit; minùs quidem cæteris corpore dolet, ast gemit miser metus tristitiæque præda: dirus animo moeror; ab eo recreari nefas; eum semper exagitat

*Occultum quatians animo tortore flagellum.*

Studet incassum mentem atris quibus afflicatur idoeis avocare; vanas sibi frustra fingit species quò eam aliò diverrat; operosa quâ pectus quatitur tussis, sputorum & quantitas & fæda indoles, febris quâ uritur hectica, respirationis difficultas, atque molestus in pectore gravitatis sensus vix sopitam citò renovant infortunii memoriam: se tunc sollicitum omnibusque præbet difficilem:

*Quod petit spernit, repetit quod nuper omisit,*

*Æstuat, & vitæ disconvenit ordine toto.*

Si sibi fucum facere, atque aliquid præsumere contigerit, se brevè agnoscit concepti erroris, speique fugitivæ ludibrium: tristem conditionis veritatem apertè declarant corporis ferè exsuccæ macies, spiritus angustiae, nocturni quibus colliquescit sudores, exhausti vires diarrhœa, pertinax ciborum omnium fastidium, proximæ mortis præ-nuncia: nam penitus exhaustis paulò post viribus, partim exesis, partim pure repletis pulmonibus, expuitionis impotens extinguitur. Si tibi venerei, scorbutici, aut scrophulosi phthisis soboles, venerea, scorbutica, scrophulosa nuncupatur; nec sagacem Medicum species unquam eludet; quælibet à vitio à quo dependet, quæ eam manifestent, symptomata mutuatur. Quandoquæ spura purulenta evanescere, mox per

\* Authore Pascaſio BORIE, anno 1746.



intervalla recurrere videntur: nonnunquam, sævientibus cæteris phthiſeos confirmatâ ſignis, tuſſis ſicca ægrum exagitat, moxque ſubito (ſi abceſſus apertura veſiculas proſpexerit) uberior quàm pro ſolito more puris copia ſputis ejicitur; ſæpiſſimè puris expuitio ferè æquabili tenore toto morbi decurſu perſeverat: hæc ſunt tabis tuberculoſæ, vomicæ, atque veræ phthiſeos diſcrimina. Modò à vitioſâ pulmonum conſtitutione primariò dependet, modò ab alterius viceris pravâ diſpoſitione, vel à prægreſſo morbo, aut à ſuppreſſâ ſolitâ quâdam evacuatione natales ducit; hæc ſympathica, aut ſympomatica, idiopathica altera dicitur. Multiplex morbi gradus; hos ritè diſtinguere plurimi Medici reſert. Si quem videris habitu corporis graciliori ac teneriori, ſtaturâ procerâ, pectore depreſſo & anguſto, coſtis protuberantibus, ſcapulis inſtar alarum prominentibus, collo oblongo, labiis genique colore roſaceis, ingenio ut plurimum præcoci; huic tabem imminere pronuntia: idem ſer judicium de iis (a) qui *tabidâ ſtirpe ſati ſunt, quaſi enim hæreditario jure omnes neceſſariò tabe marceſcunt; hocque malum ſæpè vidimus in omnes ejusdem familie ordine graſſari*. Preſſo pede ſequentur, ni cautè obſliteris, dolor à parte anteriori pectoris ad poſteriorem proterſus, importunus vel levi de cauſâ anhelitus, ponderis ſenſus, tuſſis vel ſicca, vel ſanguinis ferax, totidem certa morbi incipientis indicia. Hunc mox confirmabunt expuitio puris, febris lenta quæ inclinante die exaſperabitur. Recenſitorum ſymptomatum ſævities, ſudores nocturni, colliquans diarrhœa, pedum tumor œdœmatofus, virium proſtratio, horrida totius corporis macies, ſuffocationis metus tabem ultimum gradum aſſecutam ſignificabunt. Conâre ut imminemtem præcaveas, aut ſaltem incipienti obſtes, dubius ſemperque difficilior in confirmatâ ſucceſſus; deploratâ nuſquam medebere; (b) *tabes cum factæ ſunt, neceſſitatem habent ut interimant*. Propoſitum pro votis aſſequere, ſi utare remedio quod imminentem pulmonum infarctum arceat, aut enatum citò referet, vel (ſi hunc infelici fato fœda ac impura continui ſolutio exceperit) quod ulceris progreſſui averſetur, ejusque cauſam evellere maximè queat.

## I I.

**PULMONES** ulcus depaſcens proximam morbi cauſam declarant ſputa purulenta, cæterorum ſymptomatum indoles, cadaverum apertio. (c) *ulceris origo deducitur ab omni cauſâ quæ valet ſanguinem in pulmonibus ita ſiſtere, ut in materiem purulentam abire cogatur*. (d) *Cum pulmo ſanguinem in ſe ipſum traxerit, aut pituitam ſalſam, & non rursus dimiſerit, ſed in ipſo coacta & compacta fuerint, ab his tubercula ſiunt in pulmone & ſuppurantur*. Nuſquam igitur pulmonum ulcus abſque prævio infarctu: hujus (e) *cauſa duplex, una quidè vitioſa Pulmonis conſtitutio, altera humor craſſius, exedens; ceu; quod eodem recidit, nimia vaſorum teneritudo atque debilitas, prava humorum craſſities atque acrimonia; ex his omnem erues facili negotio variarum phthiſeos ſpecierum æthiologiam*. Cauſarum quas memoravimus actioni favent ſolitæ evacuationis ſuppreſſio, vis ingens pulmonibus illata, ciborum acriorum atque calidiorum ingeſtio, vehementiora animi pathemata, aer nimio calore aut frigore, humiditate, gravitate, aut alienarum particularum miſcelâ inſenſus, verbo quilibet rerum non naturalium abusus. Morbi cauſarum hiftoriam meditare; patebit in imminenti phthiſi imminere Pulmonum infarctum, eundem in incipienti exiſtere, in confirmatâ ulcere Pulmones exedi; eluceſcent & triplicis assignatæ indicationis veritas, & remedii his implendis accommodati neceſſitas, utilitas, præſtantia.

## I I I.

**CAUTERIENSEM** vicum in Pyreneorum montium parte apud Bigerrothes conſpicuâ ſitum nobilitant tres thermalium aquarum fontes, totidem balnea. Harum temperatiores, aquæ ſcilicet ſcatebræ vulgò *Laralière* dictæ, ſolæ ſunt quæ in præſenti morbo commendentur; nihil in hâc totâ rerum univerſitate, triplici memorato effectui proſuendo, iis reperies accommodatius. Maximâ ſpiritus ſulphurei copiâ, multo bitumine imprægnantur; alkali continent non paucum ſalis marini baſis

(a) Fernel.  
de pulm.  
morb.

(b) Hipp.  
lib. 10. de  
morbis.

(c) Boerh  
de phthiſi  
Aph. 1197.

(d) Hipp.  
lib. de inter  
aff. cap. 4.

(e) Fernel.



3

æmulum; Marte pauco, paucissimo sale glauberiano ditantur. Principii quintuplicis præsentiam demonstrant quæ sequuntur observationes & experimenta.

### OBSERVATIONES.

Odorem atque saporem concepti ovi apprimè referunt, utrumque brevissimo temporis spatio amittunt aeri libero expositæ. In scaturigine, semi-minutæ spatio, plumbæum, sparsis hinc & inde rubris viridibusque labeculis, argento colorem conciliant.

Tactu lentæ, pingues, oleosæ percipiuntur: quos percurrunt alvei materiâ obducuntur pingui, copiosâ, cinerei coloris; abrasa 24 horarum spatio renovatur.

Terrâ fons circumdatur pingui, nigricante, metallicis splendentibus lamellulis reſertâ.

In scaturigine epotæ primis diebus ventriculum ac intestina turbant, dejectiones nigricantes promovent; postea alvum adstringunt, diarrhœisq; etiam contumacissimis feliciter medentur.

Si quales in fonte reperiuntur acidis aut alkalibus immisceantur, nulla fermentatio: si variis tincturis, aut lacti, nulla mutatio.

Plantis aromaticis amaro, serpyllo florent circumjecta fonti loca.

### EXPERIMENTA.

Dum earum tentatur evaporatio, eundem ac hepar sulphuris odorem exhalant; vas, si argenteum, flavis, rubris, cæruleis, nigrisque maculis inficitur.

Ita sensim igne spissescunt ut petrolei colorem atque consistentiam æmulentur.

Hujus aquæ miscelâ virescit syrupus violaceus; eadem cum oleo vitrioli fermentescit.

Aquâ igne spissatâ Gallarum tincturæ immixtâ, sæx successu temporis decidit, hæc si exsicceſcit nigrescit; in pulverem redactæ pars quædam magnete ducitur.

Si dissolutioni argenti affundatur, opaca fit illic mixtura, datque faciem flavicitrini coloris.

Factâ, ejusdem atque dissolutionis mercurii ope spiritûs nitri, mixturâ, mercurii fit revivificatio; pars quæ sulphuri in aquâ superſtiti annectitur, præceps dejicitur; dum pars altera bitumine correpta, fursim elevatur, atque splendentem pelliculam efformat: metallis, sæcis atque pelliculæ frictu, assuetæ mercurio accidunt coloris mutationes.

Cristallos dant, paucas equidem, sali glauberiano haud absimiles.

Aquæ addito oleo calcis fit materiæ cum acidis fermentescens præcipitatio.

Spiritus volatilis præsentiam testantur inter observationes prima, secunda, sexta. Inter experimenta, primum, quintum, sextum.

Partem bituminosam indicant inter observationes secunda, tertia, sexta. Inter experimenta secundum, sextum.

Alkali demonstrant inter observationes prima. Inter experimenta primum, tertium, quintum, & subsequentiâ.

Aquas sale glauberiano pollere probant inter experimenta, septimum, octavum.

Martem demonstrant inter observationes tertia, quarta. Inter experimenta, quartum.

Sapone igitur balsamico atque Martialisato præditæ sunt aquæ Cauterienses; eas tabidis amicas suadet ratio, confirmat experientia.

### I V.

**I**MMINENTEM Pulmonum infarctum feliciter præcavebis, aut impactam in iis materiam tutò reſerabis, si tenerioribus debilioribusque vasis robur, elasticitatem concilies; spissiora fluida comminuas, acriora demulceas: quid, velim, his muneribus implendis aquis Cauteriensibus efficacius? Martè vim, elaterium vasis impertiuntur; sapone crassa dividunt; stagnantia pellunt: acria balsamo temperant. Remedium ipsi Pulmonum ulceri præstantius nullum; repetitis quas prorit vasorum oscillationibus



*extravasatos humores maturat, coquit, coctorum excretionem juvat, ulceris labia deterget, emollit, omnibus attritis obicibus circulationis vias expedit, eas verbo omnes inducit conditiones quæ & ulceris extinguendo fomiti, & novorum vasorum evolutioni, atque glutinationi favent. Ne tamen aquæ laudatæ ita fidas, ut eâ solâ absolvendam curationem existimes: si natales peculiari veneno morbus debeat, huic specificum subsidio advoca. Nusquam expertissimorum Medicorum testimonio comprobata auxilia negligas; proderit in imminente, atque in incipiente morbo moderata equitatio: sæpius fiet lactis usu cujusque tabis facilior promptiorque sanatio: si laxandi, humectandi, atque demulcendi sit animus, lacte asinino; si temperandi simul & conglutinandi necessitas, caprino; vaccino tandem urare, dum nutrimento præsertim opus est; has varias lactis species, si ferat stomachus, sincereas, sin minus, aquâ calcis, decocto verò radicum tormentillæ, bistortæ, aut fragariæ commixtas biliosis, melancholicis suade. Aquæ quantitas à libris duabus ad tres, quatuorve mane jejuno ventriculo per 20 aut 30 dies pituitosis, sanguineis; parciore verò biliosis, melancholicis imperanda, sed diutius insistendum: larga in imminente atque incipienti phthisi, in confirmatâ parciore concedenda. Rationi suffragatur experientia: fidem ferè superant, quos continuò operantur, effectus. Cauteriensem Vicum quotannis appellit languentium tabida cohors, spe recuperandæ sanitatis allecta; votis fiat eventus. Famam multiplici partam successu non solum servant incolumem, eam quoque ita adaugent, ut sint hodie maximè apud Benearnenses, Tolosanos, Burdigalenses, Hispanosque Medicos existimatione.*

## V.

**A**QUIS igitur Cauteriensibus uti ne dubites; præsentissimam tetro phthiseos delendo fomiti opem exhibent: in unum felici amicoque connubio juncta continent varia quæ tabidis opitulari posse hætenus Medici arbitrati sunt. Ast, inquires, innumeris saponum atque balsamorum formulis ejusdem naturæ, ac consequenter ejusdem virtutis referata sunt quamplurima Medicorum opera; miris extolluntur et comiis; in praxi spem frustratur eventus. Plurima saponacea balsamicaque medicamenta excogitata fuisse non diffiteor; verùm hæc cum aquarum principiis nomine tenus conveniunt, re discrepant: acri parte semper nocent, ethi accuratissimâ arte confecta; eorum idèò defluxit usus. Artem, in suis semper natura superat operibus; rectior in aquis principiorum proportio, perfectior digestio, atque elaboratio, majorem idcirco in dies famæ celebritatem assequuntur; (a) *Opinionum commenta delet dies, naturæ judicia confirmat.* Ne ferri, in teneros debilesque phthificorum Pulmones vim & actionem pertimescas: exigua est ipsius quantitas, balsamo insuper comite ita temperatur, ut nullam producere queat irritationem; tussis mitigatio hujus veritatis argumentum.

(a) Cicero  
de Legib.

*Ergò Phthisi ultimum gradum nondum affectæ, aquæ Cauterienses, vulgò de Cauterès.*

## DOMINI DOCTORES DISPUTATURI.

M. Joannes-Josephus GILLE.	M. Joanes-Baptista-Adrianus ROSE DE L'ÉPINOY.	M. Ludovicus-Alexander DE CÉZAN.
M. Joannes-Jacobus-Henricus DUCOS.	M. Josephus-Franciscus BOUR- DIER DE LA MOULIERE.	M. Joannes-Baptist L'ANGLOIS.
M. Antonius-Petrus DEMOURS, Regis Christianissimi Ocularius de signatus.	M. Antonius-Franciscus-Jose- phus DESMARESCAUX.	M. Henricus RAIMOND, Regis Exercituum in Insulâ Corsicâ Medicus.

Proponebat Parisiis, PHILIBERTUS BORIE, Nivernensis Saluberrimæ Facultatis Medicinæ Parisiensis Baccalaureus, A. R. S. H. 1785, AB OCTAVA AD MERIDIEM.

Typis QUILLAU, Universitatis & Facultatis Medicinæ Typographi,  
viâ dictâ du Fouarre, 1785.

